

四庫全書

史部

欽定四庫全書

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷四十三

飭臣工一

康熙七年戊申二月丁酉

上諭吏部等衙門前諭督撫奏事必舉其事之原委明晰  
入告部院將應結之事亦即行完結勿得遷延駁察近  
見督撫奏疏仍有事情未晰者部院亦有將應結之事

遷延駁察者如此草率不加詳慎殊負委任之意今後督撫奏事若不詳明具奏著嚴行叅處各部院若將應結之事復搜求細故借端駁查定行治罪

康熙八年己酉六月丁卯

上諭戶部凡奉差及直隸各省地方見任各官俱有董理公務並撫綏百姓之責宜各盡乃職以副朕差遣簡用之意近聞奉差官員及督撫提鎮大小文武各官不思盡職惟圖利己及買良民為奴甚至多買餽送親友此

等違法妄行殊屬可惡以後著通行嚴禁若仍前恣買良民者從重治罪決不姑恕

康熙九年庚戌三月己卯

上諭吏部等衙門時已入夏雨澤愆期皆由部院大小臣工因循舊習不能精白乃心公廉盡職以致政務失當有干

天和爾等堂官宜力圖修省靖共職業嚴督所屬司官凡事秉公勤勵革除積弊毋得瞻徇情面仍稽察胥吏作

奸事有宜結者速為完結勿借端屢駁異遂已私至於  
法司一切訟獄務期平允得情速審速結勿株連無辜  
久致淹繫爾等大小官員當實心修省毋視為具文怠  
玩如故有負朕委任責成之意

九月乙亥

上諭吏部兵部朕惟致治雍熙在於大小臣工悉尚廉潔  
使民生得遂內外滿漢文武官員各有職守必律已潔  
清屏絕餽遺乃能恪共職業副朕任使近聞在外文武

官尚有因循陋習借名令節生辰剝削兵民餽送督撫  
提鎮司道等官督撫提鎮等官復苛索屬員餽送在京  
部院大臣科道等官在京官員亦交相餽遺前屢經嚴  
禁未見悛改殊違潔已奉公之義兵民日漸困乏職此  
之由以後着痛加省改斷絕餽遺以盡厥職如仍蹈前  
轍事發之日授受之人一并從重治罪

康熙十二年癸丑五月庚辰

上諭吏部國家大小事務在內責成部院在外責成督撫

其事情重大繁難者仍照限完結如平常易結之事理應速結以清壅滯近見內外各衙門題覆本章有將易結之事遲延不結必俟限滿具題其不行具題完結者必多牽連守候以致苦累自後著速行完結毋得遲延務俾案牘一清副朕委任至意

八月庚子

上諭都察院左都御史多諾等曰爾衙門職係言官凡事宜各抒己見豈可以公同具奏充數已乎爾衙門所奏

之事雖皆曾經列名但副都御史岳諾惠等畏懦瞻顧  
竟無建白嗣後應公奏者公奏若事應獨奏其各出已  
見以聞

九月甲申

上諭吏部等衙門國家致治首在崇尚寬大愛惜人才俾  
事例簡明易於遵守處分允當不致煩苛乃符明作惇  
大之治向來各部院衙門俱定有處分條例已經頒行  
但其中款項太多過於繁密以致奉行者或以膠執為



守法或以苛索為詳明或例所未載援引比附輕重失  
宜徒據成規罔原情理大小各官稍有過誤動觸文網  
雖具才能弗克展布深為可惜著部院各衙門將見行  
處分條例重加訂正斟酌情法刪繁從簡應去應留逐  
一分別詳議具奏

十二月辛丑

上諭吏部兵部國家用人宜先沈靜之才人臣服官首重  
廉恥之節邇來文武官員或因不得陞遷或因不得差

遣輒稱冤抑紛紛控告不過圖便已私原非從公起見縱屬應陞應差而自為辨白希求營利廉恥之道已虧豈能修舉職業克副任使理宜嚴禁以肅官常爾二部可通行申飭

康熙十三年甲寅正月庚辰

上諭朝覲藩臬等官曰爾等朝覲官員各有職掌俱宜實心任事潔己愛民安輯地方消弭盜賊錢糧不得加派刑名務期明允賑濟蠲免必使民沾實惠以副朕察吏

安民至意如不遵行國法具在

三月辛巳

上諭安南將軍華善曰京口地當要害特遣爾率兵往鎮  
倘附近有警亦宜應援軍行往來與駐防之地務嚴禁  
軍士勿令擾民間前者兵行率多擾害爾等當以為戒  
否則罪有所歸

康熙十六年丁巳三月己丑

上諭鑲白旗副都統吳宣及兵部尚書塞思赫顯親王下

長史馬七辦理府務佐領達席賢溫郡王下長史鄂樂  
辦理府務一等護衛郭布博濟等曰邇年以來鑲白旗  
盜賊光棍匪人甚多凡此妄行之人皆因該管官不豫  
行曉諭嚴禁聽其陷於法網無知愚人自投死地且某  
旗好尚何事則一旗之人皆尤而效之某族中好尚何  
事則一族之人皆尤而效之種種陋習罔不漸染爾等  
係此旗官員各有管轄教訓之職嗣後須曉諭嚴切務  
令盜賊光棍永行禁止至於所屬之人因伊主幼小遂

爾貌視恣行匪僻此皆爾大臣衆官不行嚴禁之故嗣後爾等宜各敬其主竭力料理公事至於用人勿得較論分屬之人惟當選擇賢能任事

七月甲辰

上諭大學士等曰人臣服官惟當靖共匪懈一意奉公如或分立門戶私植黨與始而蠹國害政終必禍及身家歷觀前代莫不皆然在結納植黨者形跡詭秘人亦難於指摘然背公營私人必知之凡論人議事間必以異

同為是非愛憎為毀譽公論難容國法莫違百爾臣工  
理宜痛戒若夫汲引善類不矜己長同寅協恭共襄國  
事是又不可以朋黨論也

八月丁卯

上諭吏部等衙門向來各衙門事件關係重大者雖有定  
限赴科道稽察但事易結者即宜速結必俟限滿方行  
題覆多致壅滯更有各項呈狀不係註銷者任意耽延  
借端拘提人犯數月不為審結無辜牽連殊堪憫惻自

後題覆本章俱速為料理不必盡拘定限至於審理事件亦速為完結照註銷欵件例定限每月造冊赴都察院科道稽察具奏爾等各宜力圖振作體恤民隱以副朕孜孜求治之意

康熙十七年戊午正月戊戌

上諭議政王大臣等曰逆賊吳三桂等背恩倡叛荼毒生靈擾亂疆宇朕念切除凶志安民社仁育義正恩威並行大將軍等既承簡任當勵忠貞之誼早奏戡定之勲

以副朕愛民至意乃自用兵以來大將軍王貝勒將軍大臣等固有盡心王事已著勞績者亦有觀望逗遛不思振旅遄進竟爾營私適已希圖便安或諉甲兵之不全或托舟楫之未具借端引日坐失事機者甚而干預公事挾制有司貪冒貨賄占踞利藪更有多方漁色購女鄰疆顧戀私家信使絡繹尤可異者新定地方亟需安輯乃於所在攘奪焚掠種種妄行殊乖法紀本宜嚴察職名從重治罪但時當進勦姑免處分策勵後效各



路大將軍王貝勒將軍大臣等各宜乘時進取恢復封疆拯救民命一切違法之事嚴加禁止倘有不遵許督撫指叅繩以重典兵丁廝役犯者其將領家主均行連坐官員犯者除本官重治外將帥分別議處地方官逢迎餽獻一并嚴懲如督撫不糾或經言官劾奏或為被害首陳該督撫以徇庇論督撫提鎮等官自違禁條加倍究治其以此傳示內外嚴加曉諭俾一體遵行

三月壬午

上諭吏部戶部兵部朕統御寰區孜孜圖治期於朝野安  
恬民生樂業共享昇平乃副朕宵旰勵精之意不意逆  
賊吳三桂背恩煽亂各處用兵禁旅征勦供應浩繁念  
及百姓困苦不忍加派科斂因允諸臣節次條奏如裁  
減驛站官俸工食及存留各項錢糧改折漕白二糧顏  
料各物增添鹽課鹽丁房田稅契牙行雜稅官戶田地  
錢糧奏銷浮冒隱漏地畝嚴行定例處分用過軍需未  
經報部不准銷美以上新定各例不無過嚴但為籌畫

軍需早減逆賊以安百姓之故事平之日自有裁酌各省督撫提鎮大小文武等官俱宜上體朕意下念民生潔已奉公愛惜物力務期早奏蕩平與民休息以稱朕乂安海宇至意

四月壬辰

上諭吏部等衙門國家設法定例原期章程盡善垂之久遠上裨軍國下益民生必藉內外臣工精白乃心恪共詳慎實心奉行方克永遵而無弊近見各處章奏凡於

見行之例或借端營私巧為掩飾或推諉卸過冀免處分或徇庇情面曲為彌縫凡行一事每滋弊端以致良法美意澤未下究而累已及民揆諸立法初意殊為未符此等情弊科道官雖有風聞因無確據難於指叅朕雖洞悉緣由期其自行改悔不加深求遂爾因循以為僥倖之路以後在內部院等衙門在外督撫各官滌慮洗心痛改積習於有益國家民生事務籌畫擔當不避嫌怨務期法行無弊恩被閭閻以副朕立法定制愛養

斯民至意如視為故事仍蹈前轍事經發覺定行嚴加處分著通行申飭遵行

七月戊午

上諭兵部直隸各省綠旗兵丁經制額數專為防守汛地征勦賊寇而設該管各官自宜實足兵數以資戰守督撫提鎮等經制兵內如有充伴當書記軍牢以及馬夫水夫等役悉行裁汰務足兵額倘仍不改陋習因循踵行該督等糾劾從重治罪若督撫徇庇不糾或為科道

指叅或被旁人首發治以徇庇之罪決不輕貸其通行  
曉諭

康熙十八年己未八月甲戌

上諭吏部等衙門凡為臣子者同寅協恭自古皆然今各  
部院辦理事務大小漢官凡事推諉滿官事之得當則  
歸功於己如事失宜則卸過於人至於入署不待事畢  
諉於滿官祇圖早歸宴會嬉遊不為國家盡力擔當料  
理公務此後各宜協力同心務盡厥職不可仍前推諉

至科道各官平日章奏內將一二可行之事隱附私情希圖作弊凡有條議鮮非無因閱覽奏疏多以已為至公至廉其囑託公事肆行妄為外播威勢挾制多端地方督撫等官莫不畏懼小民困苦未必不由於此作何懲戒著九卿詹事科道詳議具奏

辛卯

上諭大學士等曰滿漢論事往往不能和衷漢官每謂滿官偏執若漢官肯實心為公據理辨論滿官豈有不從

之理若滿官堅意偏執漢官即當奏聞從來有治人無  
治法為政全在得人臣事君全在辨心術之公私今  
爾諸臣之才皆能料理政務但徇私利已者多公忠為  
國者少若諸臣肯洗心滌慮公爾忘私國爾忘家和衷  
協恭實盡職業庶務何患不就理國家何患不治平哉  
爾諸臣其勉之

九月庚子

上諭議政王大臣等曰孫思克奏稱賊多步行踰嶺登山



如履平地小路曲徑賊所稔知我兵前進恐賊由曲徑潛躡我後以絕餉道為害滋甚朕思秦地綠旗之兵為數甚多其中步兵不少且各省綠旗兵向推秦兵精銳賊能跋涉山嶺我兵募養有年何獨不能況漢中興安為秦內地滿漢大兵經行熟悉何得視同絕域輒荒誕其辭凡將帥用兵前進衝鋒後顧餉道務詳度以合機宜乃一定之道也倘以賊間道潛來斷絕餉道為憂怯懦不前則永無破賊之日矣又疏言大將軍公圖海分

滿漢兵為四路雖分賊勢終憂兵單綠旂兵每人止有一馬且未必皆強壯可用之兵惟滿洲大兵堪任第為數無多雖欲另調又恐秦地三邊番夷甚衆當此秋高馬肥思逞之候實無兵可調不若俟來春二三月間塞外草尚未生水泉猶涸之時多調邊兵以資戰守各路進發朕思秦中滿兵不少綠旂兵較各省更多今稱兵力單弱顯屬畏縮憚於進兵且各省綠旂兵亦止一馬曾無多給而且越境征勦粵東粵西閩楚諸處今又進

定滇黔較之平定境內漢興勞逸何如耶向者凡將軍提鎮官募兵時必選精壯勿使濫收充數定例嚴明今若以秦兵皆非強壯難以應用則孫思克職任何事觀此則欺蔽之情更顯然矣且有將軍公圖海在彼乃妄議大兵多寡殊屬狂妄又云番夷馬肥思逞欲俟來春二三月間草尚未生泉水猶涸之時進取設或二三月間進取之後四五月間番夷馬肥思逞將若之何正值秋成涼爽各處賊寇大敗震驚之餘不速行蕩平反

欲於來春青黃不接之時進取是又何意耶又奏稱秦  
省大半皆山地瘠民貧不產秔稻所種惟麥豆之屬向  
有捐納之事稍裨用兵今例已停罷民受採買之苦且  
山路險阻必資負載駝運其僱賃之價數倍於應輸之  
賦今各路需餉甚多山徑狹隘輓運維艱時當初冬草  
枯葉落畜牧無資欲俟來春調集官兵務期兵強餉足  
共圖進取者職此之故朕思粵東粵西諸省山嶺亦多  
何曾豫備糧餉官兵豈有止食稻米不食他粟之理至

於捐納各省俱停止留粵西事例以資平滇軍需之用  
自定秦省數年以來未曾勞民轉運且漢興雖多險阻  
乃陝西內地非隔省百姓轉輸可比今恐輓運累民至  
春又誰為轉運耶當逆賊敗遁之時急令進兵者正為  
早定地方以安百姓耳採買恐累於民巡撫抗愛題奏  
已經改定今以請開事例轉運維艱為辭其規避進兵  
明甚又疏稱八旗官兵今年七月二十八日京師地震  
房屋傾壞壓斃人民聞之各懷內顧之憂臣所以暫停

進取以回

天意俟人心稍定再議進兵未晚朕思八旂官兵世受養朕之加意臣僚士卒尤為渥厚不特房屋傾圯細故即蹈湯赴火誼亦難辭孫思克封疆大臣凡事不加詳察妄言人情皆動以惑軍心殊失大臣之體細察孫思克疏內前後情由惟耽安逸怯於進兵列款巧奏且自秦省有事孫思克等係封疆大臣俱應按律議處念同大兵進剿宥過計功給以世襲之官加以不次之擢當

捐軀報國破賊安疆自請前進効力乃孫思克身任提督統轄全師不思奮力前進反煽惑滿漢動搖民心飾辭妄奏深負朕擢用之恩情罪殊屬可惡其令翰林學士喇沙里速往嚴取口供來奏尋喇沙里取供還奏

上曰孫思克理應嚴察治罪但今方統兵與大兵分路進剿候事平日再議

十月辛卯

上諭九卿詹事科道等曰邇來諸事爾等全不擔當或遇





等勉之

康熙十九年庚申正月辛亥

上諭九卿等曰科道官內陞外轉原以示勸懲也今見才優者猶知憚於外轉其或才力不及不稱言職之人安於外轉道員者甚多是但以示勸非所以示懲也故令九卿詹事科道會議務期得當乃會議時俱瞻徇情面不肯議以小品用此無他直是畏科道耳夫人臣事君苟立心正直行事公平何所顧慮於人其畏科道者皆

由平日自處不正故也朕於諸臣素行無論在官在家一舉一動罔弗知之不即發覺者欲令改過自新以全國家待臣下之體奈何不畏朝廷而徒畏科道之指摘乎近日科道官專以虛聲肆其恐嚇並未有真能叅大奸大貪者如此不職若不分別懲勸何以大破積習使知勉勵乎據魏象樞等奏恐天下不肖之輩不識朝廷慎重科道之意疑為厭薄言路之端邇年以來姚文然李之芳施維翰等內陞未久即任以大僚督撫亦因其

克盡言職才能素著之故此無論天下智愚賢不肖當亦知朝廷無厭薄言路之意矣其外轉者或係素無建白或係昧於事理或係任臆妄言或係才力不及原非因其條奏而外轉也外轉科道以小品官員用遂言有礙國體殊不可解朕心本虛公初不執定一說若果在必行何難旨意票出特命諸臣會議者正欲公同參酌務合乎中道耳爾等可傳諭各官示以朕意

二月壬午

上諭大學士等曰初逆賊反叛時克殫忠義或從賊所設計來歸或大兵已至尚為賊困此等人錄其善而獎其忠方為允當亦有大兵已恢復地方奸猾之徒先附賊妄行因賊衆潰散焚毀偽劄逃避山林文飾耳目以圖僥倖者今給事中姚祖頊請獎叙被難人員甚為失當可加嚴飭嗣後科道官條奏朕先行披覽仍面加詳問如此則人之才能及所奏之意咸可知矣

五月癸卯

上諭大學士等曰向以亢暘齋居虔禱雖雨澤薄降四野  
田疇尚未霑足今茲不雨為時又久旱魃為災朕甚懼  
焉意者政事之失宜者多歟不然

天心仁愛下民何其宜雨而久不雨也日者以政理之故  
勤求言矣而言者文繁無益其集九卿詹事科道掌  
印不掌印各官問有何事當行何事當革悉意以陳  
毋有所隱

是日

上諭大學士九卿詹事科道等曰朝廷致治惟在端本澄源臣子服官首宜奉公杜弊大臣為小臣之表率京官為外吏之觀型大法則小廉源清則流潔此從來不易之理如大臣果能精白乃心恪遵法紀勤修職業公爾忘私小臣自有所顧畏不敢妄行在外督撫各官自應慎守功令潔已愛民乃大臣等每自謂清正無私粉飾空言至其所行往往營私作弊有玷官方深負委任之意科道係耳目之官凡有弊端自當據實叅奏且居處

甚近如此情弊豈無見聞乃瞻徇情面緘默不言即有  
條奏多係繁文言官職掌殊為未盡如肯從公糾舉孰  
敢恣行無忌朕以為目今之弊莫大于此近因天氣亢  
旱朕夙夜焦思念慮所及無不舉行感格之道猶恐未  
盡故特召爾等各面陳所見因宣諭朕意令爾等知之

六月戊辰

上諭黃巖總兵官林本植曰黃巖要鎮今海賊雖已敗遁  
恐其出沒不常又沿海之民或有奸宄勾連外寇為害

匪細尤宜加意嚴防林本植奏曰沿海之地必須精練水師臣西北人恐未深諳

上曰自古用將何分南北惟在得人且靖寇本以衛民攘外必先寧內為將之道亦惟在得民心也

七月乙未

上諭陝西總督哈占四川巡撫杭愛曰據哈占奏稱秦餉由畧陽運至保寧令四川接運杭愛又言四川官少船缺不能接運杭愛既以不能接運為言仍著哈占及巡



撫鄂愷甘肅巡撫巴錫等即以畧陽糧艘運官運至敘  
州四川督撫速趣空船使回方今大兵進剿雲貴需餉  
至急既已尅期進取輓運無過今秋川陝督撫自宜殫  
心籌畫勿悞軍需乃妄分彼此互相推諉遲延至今殊  
負職任嗣後當同心商酌不拘疆界速為饋運無悞進  
取如仍推諉遲延有失軍機經管其事自督撫以下各  
官俱以軍法從事

康熙二十一年壬戌正月己巳

上諭理藩院尚書阿穆瑚瑯等曰近見內外蒙古接壤處所互相攘奪盜竊者甚多遇此種事遣爾衙門官員前往察閱不思調和兩界裨益地方據實奏聞以副朕驅使但苟且竣局希圖脫免凡事有問諉云不知今朕俱已洞悉爾等堂司官何曾啟奏一事尚可謂克盡職掌者乎嗣後務期勤慎宣力不得仍前草率疎忽

二月壬辰

上諭直隸巡撫格爾古德曰凡為官者承貪吏之後名譽

甚易承良吏之後名譽甚難金世德于成龍居官有聲  
爾繼其後得名必遲爾毋欲速以求名速則恐致擾民  
直隸旗下莊頭與民雜處朕聞所在凶惡莊頭自以旗  
下倚恃其主甚為民害爾蒞任後加意嚴查務期懲創  
即管皇莊者亦毋寬宥

九月巳酉

上諭福建將軍佟國瑤曰國家設立督撫提鎮原以為民  
向來駐防鎮江杭州福建等處漢軍官兵皆恣意妄行

侵占市廛擅放私債多買人口如哈喇庫諾邁等一味營私罔遵法紀買人口至盈千百此等匪人用之何益昔孟喬芳總督陝西李率泰總督福建俱能潔已奉公愛民恤士秦閩人至今思之爾到地方宜恪遵國憲安戢兵民毋負朕委任至意

十月乙亥

上遣郎中崑篤倫等採辦楠木

諭之曰爾等查採楠木所至地方當會同督撫實心詳察

母借端滋擾凡官廨民房寺廟墳墓毋拆毀封採恐奸  
徒乘機詐害平民此意可曉諭地方令共悉知

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷四十三

欽定四庫全書

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷四十四

飭臣工二

康熙二十二年癸亥二月壬午

上諭直隸各省朝覲各官曰爾等各有職掌關係國計民  
生宜實心辦理如奏銷錢糧採買米石借端浮冒希圖  
侵尅審理刑獄顛倒是非稽延歲月致累平民皆因爾

等因循怠玩積弊未除嗣後俱宜潔已奉公殫心盡職  
諸凡公務俱照在內各官衙門事例勤慎辦理副朕察  
吏安民之意若謂道途遙遠所行弊端未必盡知仍沿  
陋習漫無省改憲典具存決不姑貸

癸未

上諭大學士等曰閱朝覲布按各官條奏於治民弭盜非  
不鋪張累牘然如何綏緝則盜源可靖如何儲備則凶  
歲無饑未見確切敷陳裨於實用惟麻爾圖所稱陝西

積欠錢糧應分四年帶徵其言頗當朕軫念陝西地方連年寇警輓運艱苦每欲蠲除宿負以兵革未息時方需餉未及豁免冀佳育言江邊蘆田坍塌無常應五年一丈量其在內田地原無增減請免丈量等語亦屬可行餘皆諸司瑣事若概令議覆徒煩章奏爾等傳集九卿詹事科道將各朝覲官奏疏同閱會議如有益於國計民生者始下所司確議否則擬旨報聞足矣且九卿詹事科道既全見伊等所奏本章則將來會推亦易知



其賢否至所頒諭旨原為察吏安民若伊等各自收藏無益其令刊刻頒發府州縣衛所使兵民一體通知不肖官員雖欲敗檢虐民亦知所忌憚不敢恣意以逞矣

三月甲子

上諭刑部國家設立問刑衙門期於明罰敕法弼教化民必審鞫精詳讞決平允而後民情悅服冤抑畢伸近見爾部審理大小事件每多草率因循瞻徇舛錯如聽訟之時兩造是非自應分別定案因意有偏私徃徃不問

曲直含糊完結以致奸頑幸免良善含冤又如奉差籍沒官員不能廉潔自持據實冊報乃恣意侵盜竟飽私橐殊非人臣奉公守法之誼至於審事官員膠執已見聽訟不公或更改口詞圖遂私意或恐嚇犯証不令直供或妄肆株連稽遲日月或怠玩疎忽苟且告竣弊端種種難以枚舉嗣後堂司各官俱著洗心滌慮痛改前非一切刑名事務必令情法允協無枉無縱恪遵法紀持廉秉公以副朕委任之意又

諭曰爾刑部弊端朕無不悉知自後永行改革則已倘仍因循如故將爾等弊端摘發一事勿望倖免亦毋望止於罷斥已也爾等又每云身為堂官筆帖式胥吏所作弊端焉能悉知今堂官亦有由筆帖式出身者斷難以不知情弊為辭朕時加諮訪諸事莫逃洞鑒而爾等諉為不知可乎用復申飭務將夙弊盡行除革毋忽

閏六月癸亥

上諭大學士等曰一切政事皆國計民生所關最為重大

必處置極當乃獲實效朕每詳覽奏章內有所疑或折五六本七八本諮詢爾等者務欲得至當耳今爾等不各以所見直陳一切附會迎合朕意則於事何益朕從來不憚改過惟善是從即如乾清門聽政時雖朕意已定之事但視何人之言為是朕即擇而行之此爾等所共知也堅執已見獨持議論之人朕素所不悅觀今之大臣甚不如昔日之大臣今之政事亦不如昔日部院無事無弊大臣無人無私外間之弊較內更多朕知之久

矣欲嚴治之則其人甚多難於盡處所以朕數年來屢下嚴旨加意剔釐今雖較前差善而弊尚未除且部院堂官止圖已身安逸辦事不勤堂官推諉司官司官推諉筆帖式早歸私家詭稱終日在署此何理也

十一月戊辰朔

上諭湖廣總督董衛國曰爾在外任二十餘年地方事宜民生利病知之已悉何待朕言第總督為一省大吏惟以奉公秉法潔已愛民為要從前用兵之際未免騷擾

閭閻今天下承平休養民力乃治道第一義何利當興  
何弊當革俱宜從實詳酌舉行惟時當承平而常若民  
生未遂民困未蘓則地方自然受福若謂地方已經寧  
謐不時加體恤則所失多矣至一切事務本可速結者  
自應速結每見在外官員故意遲延致滋民累爾宜申  
飭所屬各官實心任事又在外官員行事京師無不悉  
知爾從前在任所行朕皆洞曉爾在軍中克有勞績朕  
即下旨褒獎嗣後務益加砥礪爾為部院已久在京部

卷四十四  
院大臣何須結納爾行事無疵何畏人言若行事失當  
雖結納大臣亦復何益耶

康熙二十三年甲子正月丙戌

上諭陝西按察使布喀曰按察使職司通省刑名必事到  
隨結不使遲悞方於事有益凡弊之生及百姓牽累皆  
由遲延不速結之故爾當潔已勤政將遲延牽累積弊  
詳加糾察勿致煩苦良民以為屬員表率

二月己亥

上諭翰林院掌院學士牛鈕孫在豐曰翰林院乃儲養人才之地教習庶常當以品行文章為事一切交際禮文皆宜杜絕近聞有餽送重禮者庶常等俱甚寒苦自翰墨外不應別有所取前拉薩禮在時待伊等甚善所以至今有感念者至庫勒納任學士以來交際之風漸盛爾等宜加洗剔無負簡任之意

三月丁丑

上諭大學士等曰昨正陽門外被火朕數遣人往視該城



及司坊巡捕營等官並無一人在者亦無一救火之人因遣內大臣侍衛往救火勢方熾未能旋熄朕親往登城指揮方得撲滅該城及司坊巡捕等官於該管地方職分所在平日不加謹隄防遇災又不急救殊為怠忽左都御史科爾坤兵部侍郎郭丕阿蘭泰奏請朕還宮伊等留視及朕還宮後使人視之伊等亦已散去城外之地多係漢官居住遇此等亦應協力料理乃置若罔聞袖手不顧則他事亦因循坐視可知伊等皆國家大

臣凡事當視若一體乃於身外之事畧不關心可乎爾等可將此言傳諭吏兵二部及都察院知之

四月庚子

上諭大學士等曰凡為臣子必實心任事興利除弊不可苟且塞責俾衙門事一切整頓無有廢弛斯不負職業若循分碌碌因人成事雖小有勤勞殊無足取

五月癸未

上諭臺灣總兵官楊文魁曰臺灣遠在海隅新經底定將

弁立功者頗多尚未簡用因爾係舊人故特簡為總兵官彼處新附兵丁以及土人黑人種類不一向來未沾教化不知禮義爾蒞任後務期撫輯有方宜用威者懾之以威宜用恩者懷之以恩總在軍民兩便使海外宴安以稱朕意至於海洋為利藪海舶商販必多爾須嚴飭不得因以為利致生事端有負委托

八月庚戌

上諭督捕侍郎達哈塔曰朕以爾素有操守簡用侍郎近

見爾衙門事務弊端尚多旂下人無不怨言若但守已  
廉潔而於凡事不能勉力肅清究竟何益嗣後爾當嚴  
率屬員事務悉加釐剔以副委任之意

九月己丑

上諭山東巡撫張鵬曰今見山東人民逃亡京畿近地及  
邊外各處為非者甚多皆因地方勢豪侵佔良民田產  
無所倚藉乃至如此爾蒞任後務剪除勢豪招集流亡  
俾得其所

十一月壬戌朔

上巡幸江南駐蹕句容縣

諭知縣陳協濟曰知縣係親民之官與一縣民生休戚相關朕巡行之次見此處百姓困苦若爾當潔已奉公愛民如子否則國法具在爾其慎之

康熙二十四年乙丑二月癸卯

上諭漕運總督徐旭齡曰源清則流潔爾為大吏潔已率屬官吏自不為奸朕因前任諸臣均不稱職聞爾向任

山東居官清慎著有賢聲故特簡茲任爾當益勵勤恪  
安輯軍民以副朕委任至意至於河漕事務原屬一體  
凡河工有關漕務者爾便宜行事不必推諉其屬官賢  
否宜從容廉訪果有真知確見方可入告凡舉一人務  
使千萬人知勸劾一人務使千萬人知懲至於待屬員  
不可過刻下吏亦各有艱難之處惟心平氣和則皆悅  
服矣

五月庚申朔

上諭新選庶吉士張希良等曰士子讀書稽古原期窮理  
致用平居砥礪廉隅敦修品行皆為異日服官莅政之  
本迨一登仕路志在功名未免奮意求進干營奔競喪  
其懷來徃徃有之爾多士從田間來甫通仕籍務宜率  
其素履不改初心凡授內外職任其各加黽勉清操自  
矢恬靜寡營循分盡職潔已愛民以副朕造就人才至  
意

八月己亥

上諭九卿等曰官以清廉為本如原任侍郎溫代察庫不可謂無才但以貪污故凡所行皆不足取此皆由不知廉恥耳又

諭曰部院堂官惟勤慎者能循分不致生事其專擅好勝之徒特欲假公事以遂其私意耳雖有才能於國家何裨

九月己卯

上諭大學士勒德洪等曰九卿詹事科道令其會議會推



本期至正至公務得真實今聞九卿會議之事間或不據實具議草率苟且因循而行有此一次立議爭勝以冀下次不與相拂而從之者或有此一次將彼意中之人薦出冀下次將其親朋薦出以相報者或有薦其門生者有薦其同年者有薦其同鄉親友者夫九卿會議會推理宜虛公持論豈可一二人專擅以行且設立科道本欲其凡事從實建言有執拗護庇者即為指叅也其擅專執拗護庇之人何未見糾劾耶衆議之時亦有

一同具議後因其事不當復云彼時我原如此說者如  
果原議時衆論與伊意不合即宜將已見明白敷陳另  
立一議既不另立一議同列職名又稱我曾如此說是  
斷斷不可者朕於康熙十八年亦因此等事曾經有旨  
申飭可查前旨一并復行傳諭凡事會議不必詢問本  
省大臣官員若每加詢問或致不肖之人益在地方生  
事橫行本省督撫地方官無不畏懼且將凡屬會議之  
事無不囑託本省大臣官員矣政務何由得平今會議

山西巡撫穆爾賽因係滿洲恐致敗露意欲從平易歸結耳若是何不於事前豫為勸戒令其公廉乃不為豫戒徒於事發之後欲如此結案可乎爾等齊集滿漢九卿大臣傳諭申飭之

十月庚戌

上諭大學士等曰近見工部凡於交送物件皆耽延時日抑勒不收弊端滋多此後其嚴禁之可傳諭工部

康熙二十五年丙寅正月甲戌雲南貴州總督蔡

毓榮題逆苗王騰龍等聚眾劫掠應行征剿

上諭大學士等曰苗蠻賦性樸實不敢生事祇以地方該管官不克平情撫恤反需索馬匹金銀誅求無已不能供應遂生釁端耳前逆賊吳三桂亦因需索水西不遂貪欲捏奏水西反叛竟自發兵剿滅盡取其利以為己有今苗蠻之事恐亦類此勅該部知之

二月癸巳

上諭直隸各省朝覲官員等曰國家三載考績原以崇獎

廉善擯斥貪殘必吏治澄清庶民生安樂今當大計已  
嚴飭所司重懲貪酷餘俱如例降革其有衆論不孚是  
非失實者特黜一二以警積玩外姑准爾等仍服原官  
爾等平日官評賢否公論昭然若值會推輒鑽營奔競  
以圖僥倖居心先已不肖何以率屬莅民且凡朝覲之  
期每因仍陋習借端科派大小相徇私通交際是察吏  
本以安民而反以擾民甚非朕激揚清濁至意嗣後務  
須洗滌肺腸勉圖自新毋貌承心違蹈常襲故國憲具

存決不爾貸

戊申

上諭吏部兵部我國家掃除逆孽平定遐荒卽負山阻箐之苗民咸輸誠供賦封疆大吏自宜宣布德意動其畏懷俾習俗漸馴無相侵害庶治化孚於遠邇近見雲南貴州廣西四川湖廣等處督撫提鎮各官不惟不善撫綏更恣苛虐利其土產珍奇貨藏饒裕輒圖入已悉索未遂因之起釁職為厲階蠢爾有苗激成抗拒卽擅殺

一二謊稱累百盈千始黷貨以生端既邀功以逞志藐  
玩因循殊負委任朕思土司苗蠻授官輸賦悉歸王化  
有何抗拒互相格鬪無有寧居嗣後作何立法務令該  
地方督撫提鎮等官洗心易慮痛改前轍推示誠信化  
導安輯各循土俗樂業遂生亦令苗民恪遵約束不致  
侵擾內地居民以副朕撫馭遐方至意

三月乙卯朔

上諭直隸巡撫于成龍曰直隸旂下各莊人戶不守法度

爾須執法嚴治不得瞻徇顧忌朕留心民瘼外事無不周知即如工部所用車輛係發價現催今俱派取州縣如此積弊不止一端爾到任逐一查明奏聞爾固宜正己率屬廉潔愛民亦宜寬以濟猛勿過刻也且居官不善縱或漏網亦將禍及子孫爾須有始有終實心任事從國計民生起見盡力為之

閏四月乙亥吏部等衙門遵

旨會推廣西按察使員缺吏部侍郎胡簡敬保舉江南淮



揚道高成美擬正湖廣下荆南道沈志禮擬陪具

奏

上諭曰凡職任緊要官員奉旨會推原期從公保舉務得真才有裨官守且官評賢否關係吏治民生若以本地方人推舉本省官員必致瞻徇滋弊前已經屢諭申飭甚明今胡簡敬以淮安府人推舉淮揚道高成美殊屬不合著嚴加議處九卿等不加詳慎草率擬推亦屬不合著通行申飭

康熙二十六年丁卯三月辛丑

上諭大學士等曰近來不雨政事恐有未當令九卿議奏  
越二日癸卯大學士等覆奏國家政事實無可更  
改釐定者

上曰堯舜之世方可稱無闕失然猶兢兢業業不敢謂已  
治已安漢文帝亦古之賢主賈誼猶指陳得失直言切  
諫今但云主聖臣賢政事無闕豈國家果無一事可言  
耶況求言原屬要事無論智愚皆當各陳已見以備採

擇始於政務有所裨益大小臣工各宜盡心職業視國事如家事方副委任之意今每部滿漢堂官各有六員其間任事者但一二人餘則隨衆署名而已即如各部啟奏本章每日不過數件其中情節如漢侍郎等未必了徹設朕問之諒有不能對者漢官公事之餘或持齋誦經滿官公事之餘或崇尚僧道不以國事為念朕觀今世之人專務逢迎諂媚鮮有直道而行者且已不勤而每誚人為惰已無能而每咄人為劣此不過徒工浮

議耳何益之有

七月辛卯刑部題浙江民張遴叩閭請發與該撫  
審理

上諭大學士等曰此案若交與該撫審理豈肯將實情明白審出著刑部擇選賢能司官往審近見河南司官審事竟不明晰此皆瞻徇各部院堂官不敢結怨耳大凡督撫無不與部院堂官營求結納分樹門戶若司官與督撫相悖即結怨於堂官尚能保其職乎部院堂官各

援引親戚朋黨營求凡員缺未出之先其人預定及會  
推時惟贊揚援引而從公推擬者甚少又有為司官筆  
帖式時所行貪婪至於大位偽稱清廉者若此居心深  
可鄙恥今部院官員亦稍知更改若循此而行固善倘  
仍蹈前轍貪汙不悛是自棄其身也雖或倣倖苟免於  
刑鬼神豈肯宥耶

己亥

上遣刑部郎中阿西潭等往浙江察審張遴一案

諭之曰向來奉差官員往往騷擾驛遞貽累小民朕深悉之故數年以來槩不差遣昨見張遴所告似有冤抑因遣爾等往理務須詳審公平慎毋顛倒是非奸民叩聞亦有巧為飾說者地方官員亦有善於夤緣者爾等不可偏私拘執專徇一面之詞必得兩造實情若是非不明輿論不服則大負朕懷矣

康熙二十七年戊辰正月丁酉

上諭江西巡撫王鴈廣東巡撫朱弘祚曰巡撫為地方大

吏以操守為要大法則小廉百姓俱蒙福矣身為大臣尋常日用豈能一無所費若必分毫取給於家勢亦有所不能但操守廉潔念念從愛百姓起見便為良吏為督撫者在朕前皆能言之及至地方與所言往往不符人貴始終如一朕特簡爾等當砥礪清操毋負朕擢用之意朕事事以百姓為念爾等到地方一切利弊有關百姓者不妨事事奏聞為大吏者亦須安靜安靜則為地方之福凡貪汙屬吏先當訓誡之若始終不悛再行

叅劾可也

二月壬子

上諭大學士等曰國家設官分職必須大法小廉實心任事庶不負朕拔擢簡用之意朕親政已久於大小官員行事無不深悉為臣子者既荷爵祿顯榮便當知足無致隕越前已屢頒諭旨又再三面加訓誨今在廷諸臣自大學士以下全不敬勤供職但知偷安自便互相交結貪賄營私種種情狀不堪枚舉九卿詹事科道皆朕



委任之員凡遇會議理宜各出已見公同商酌乃一二  
人倡率持議於前衆遂附和於後又其甚者雖在會議  
之班茫無知識隨衆畫題更有於集議時緘默自容及  
至僨事巧行推卸此等情狀朕所痛惡至於用人關係  
重大恐賢否難以周知故遇緊要員缺特令會推原期  
為國得人亦欲令被舉之人警心易慮惟恐溺職累及  
舉者因而自加勉勵乃歷來所舉官員如張汧章欽文  
之流貪黷敗類往往發覺此皆瞻徇情面植黨納賄所

致前者班布爾善阿思哈等身為大臣所行悖亂致干  
重辟然朕尚耿於懷是以比來大小官員徇私納賄朕  
雖洞見而不即指發冀其省改庶可終始保全豈意積  
習深錮漫無悔悟如審擬蔡毓榮一案瞻徇黨類百計  
營救因朕具悉其奸私謀莫遂近差色冷額往審張汧  
被叅情由朕曾諄諄面諭及色冷額回時奏稱此案若  
有失實甘治死罪朕覽其奏案則又庇護保舉張汧之  
人內閣擬票亦未議及又靳輔下河工程屯田之案朕

早已察其情弊及遣佛倫等前往勘議甚屬偏私且凡會議之時科爾坤佛倫等務執已見苟非懷挾私情何以力排衆議屢經誠諭未見畏悔物議沸騰輿情憤激以致言官列款叅奏雖言官亦非先期舉發直待朕諭飭之後方行論糾然爾等果能持公爭論何致敗事且爾等行私朕皆洞曉因不忍加刑于大臣又用兵之時有著勞績者故免其彰顯厥罪嗣後大小臣工各宜痛改陋習勉盡職掌以副朕寬大矜全之意

五月壬申朔

上諭大學士等曰凡會議政事必詳察合理不可怠忽輕  
易朕每遇事之大者即與內閣大臣商酌而後定凡授  
大僚無不如此至吏部陞補官員俱有一定之例或有  
不肖之徒賄求不已此皆習俗不良今當痛改前轍凡  
事俱各抒己見一意秉公不可碌碌徇人且徇人何益  
孰優孰劣豈有不知者乎

康熙二十八年己巳三月丙申

上諭大學士等曰凡地方文武官員務須各盡職掌實心  
任事黽勉効力方為稱職今見直隸各省文武各官多  
有虛糜廩祿怠玩因循事務廢弛行伍虛冒船隻任其  
朽壞器械全不整理且有無多寡茫然不知總因任內  
職業視為具文漫不經心殊屬不合著各該督撫提鎮  
通行所屬官員嚴加申飭令其痛改積習力圖振刷恪  
勤守職如仍前玩忽定行從重治罪

康熙二十九年庚午正月己酉

上諭九卿等曰朕自臨御以來夙夜兢兢勤求治理念切民依冀登安阜去歲畿輔旱荒雖經蠲租發帑賑濟窮黎朕猶軫念未已卿等各宜恪體朕衷持廉秉公實心盡職毋得營私結黨師生親友互相徇庇聽受囑託遇事推諉自圖便安務期於國計民生實有裨益

康熙三十年辛未十一月己未

上諭吏部從來致治之道在正人心人心偏私則詐偽日生而習俗滋弊人心公直則囂競自息而庶績允釐朕

早夜孜孜崇尚德教蠲滌煩苛期與中外臣民共適於寬大和平之治凡大小諸臣素經拔擢咸思恩禮下逮曲全始終即或因事放歸或罹咎罷斥仍令各安田里樂業遂生惟爾諸臣亦宜奉職恪共絕偏私而襄國事近見內外各官間有彼此傾軋伐異黨同私怨交尋牽連報復或已所銜恨而反囑人糾叅陰為主使或意所欲言而不直指其事巧陷術中雖業已解職投閒仍復吹求不止株連逮於子弟顛覆及於身家甚且市井奸

民亦得借端凌侮蔑紀傷化不可勝言凡若所行雖迹甚詭秘朕總攬機務已三十年此等情態知之甚悉倘因仍陋習益致蔓延殊非朝廷所以體恤臣工保全愛惜之意夫讒譖媚嫉之害歷代皆有而明末為甚公家之事置若罔聞而分樹黨援飛誣排陷迄無虛日以致釀禍既久上延國家朕歷觀前史於此等背公悞國之人深切痛恨自今以往內外大小諸臣應仰體朕懷各端心術盡蠲私忿共矢公忠豈獨國事有裨即爾諸臣



亦獲身名俱泰倘仍執迷不悞復踵前非朕將窮極根  
株悉坐以交結朋黨之罪爾部可即傳示中外使咸知  
朕意



大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷四十四

# 欽定四庫全書

史部

聖祖仁皇帝聖訓卷四十五至  
七

臣 永瑤 恭 校

編修臣 裴謙 覆 勘

總校官原任中允臣 王燕緒

校對官中書臣 石鴻緒

謄錄監生臣 方汝觀

欽定四庫全書

大清聖祖合天弘運文武睿哲恭儉寬裕孝敬誠信中和功德大成仁皇帝聖訓卷四十五

飭臣工

康熙三十二年癸酉十二月癸酉

上諭翰林院掌院學士傅繼祖等曰翰林院衙門甚屬緊要凡翰林官每日作文寫字誦習講究是其分內之事各宜勤勉以盡職掌若有結交不肖牽引妄行遇學差

缺出恣為奔競營求者不時訪察題叅

康熙三十三年甲戌正月丙辰

上諭大學士等曰凡為臣者須行實事不當沽取虛名于成龍奏稱豁免民夫河道工程浩繁能不用民夫而可以集事乎且河道增設一官則民間多一事現在所設官員歷年料理工程並無違悞之處總之河工經理惟在得人不在增設官員也于成龍任直隸巡撫時居官好亦曾効力但為人膽大凡事必欲取勝其所奏之

事止徇人情面欲令人感彼私恩夫擢用人才乃朝廷之大權非為臣者市恩沽名所可擅行之事也至於成龍條奏內修理通州天津一帶河道及培修高家堰堤亦有當酌議之處高家堰保淮敵黃甚為緊要稍有疎虞則淮安一帶州縣居民田廬皆受水害矣

二月壬申

上諭大學士等曰設立科道官員特為條奏政事今觀都御史以至科道條奏者少間有條奏者每存私意或將

不睦之人欲行傾陷則託辭叅奏此等情弊朕豈不知嗣後科道官員各宜端其心術以有益國家之事條奏爾等可將此旨傳諭

三月丁卯

上諭大學士等曰山東巡撫桑額奏所屬積貯米穀並無虧空此前任撫臣佛倫奉行之善也朕巡幸霸州時聞大城縣知縣祖延泰散穀賑濟或有富戶冒稱飢民者查出即將其家所積之穀散給貧民因此並無假冒貧

民得沾實惠是則奉行之善存乎其人從前總督張長庚屈盡美巡撫白色純韓世琦等居官不善不數年間子孫窮困由此觀之徒貽惡名此輩所貪取者今安在哉且居官果善其光榮自不待言如江南將軍博濟調西安將軍起程之日兵民泣送屈盡美居官不善離任之時地方百姓皆為切齒居官善否舉朝之人及地方百姓自有公論豈能掩飾哉

十二月庚戌

上諭大學士等曰朕覽福建浙江總督朱弘祚大計疏內有閩省地瘠民飢之語豈福建全省之人盡皆佻薄乎原任四川巡撫張德地署理延綏巡撫時曾奏延安邊地並無可舉博學宏詞之人原任少詹事邵遠平奏南方之人皆輕浮不可用朕思賢才不擇地而生雖深山僻地豈無人材至於南方之人豈盡皆輕浮不可用者二人所言甚不愜於朕心因皆罷斥今朱弘祚又以此等謬言陳奏殊屬不合著該部察議具奏



康熙三十四年乙亥二月戊戌

上諭大學士等曰近觀言官奏事或受人囑託或懷私賣本所奏之事俱非無故如原任侍郎鄭重門生曾任陝西縣令為總督佛倫題叅遂轉囑彭鵬將陝西全省官員俱行叅奏豈有因一人之仇遂叅全省官員之理凡任言官者但宜將關係國家得失民生休戚之事從直陳奏豈可受人囑託懷挾私仇賄賣本章而條奏乎如有此等之人必盡察出正法斷斷不恕

康熙三十五年丙子八月辛亥

上諭大學士阿蘭泰曰軍士所乘之馬朕早令行察至今  
尚未具奏部中各官凡事不行速結惟務偷閒入署未  
久即散歸家偃息如此則政事有不壅積者乎朕聽政  
三十年夙興夜寐有奏即答或有緊要事輒秉燭裁決  
此爾等所共知也各官果能勤敏諸事何至遲悞可同  
戶兵二部大臣速行察奏

康熙三十六年丁丑正月甲戌

上諭大學士等曰觀九卿凡保舉人員非係師友即屬親戚是皆漢人相沿惡習天下官員朕一人何能周知惟左右大臣是賴誠善者善而惡者惡據實敷陳則善者勸而惡者懲矣國家事安有不理者乎況科道乃耳目之官如總兵卓策柯彩許盛居官最為貪鄙朕聞其軍民皆怨乃為懲治前此科道官曾有題叅者否爾等以朕旨宣諭倘後仍蹈前轍必不寬貸

二月甲申

上召督運都察院左都御史于成龍等問曰爾等何日起程于成龍奏曰俟効力運米官齊集同行

上曰爾此意即謬矣人臣宜以國事為重勤勉自効豈可援引朋類當此軍務緊急爾等宜率先啓行餘令陸續隨往若必俟衆同行豈不誤事爾自任巡撫及為總河惟知援引私人其後運米亦仍如此爾在河工曾帶二百餘人前往迄今未用一人欲任意援引得乎爾又云寧殺于成龍至効力人等不可不用此語豈非沽名干

譽之意乎朕已屢加嚴飭爾竟不悛何也朕於國家之事未嘗膠執已見惟虛己以視機宜即用兵之道亦復如是一日之中千變萬化朕統大兵至克魯倫時亦視賊之形勢隨機而應竝不豫立已見孔子云毋意毋必毋固毋我聖人之言至當不易爾惟執已見前此運米已因待衆悞事今又欲俟衆同行此意不過欲扶助黨類令其感激耳用人之權豈人臣所得專擅朕今用人若有保舉官員亦必就中論俸陞補即素所深知者亦

視其効力之處酌量用之否則俱使論俸朕乃天下之主用人之際尚不肯任意為人臣者乃妄意自擅可乎大抵欲援助人者後必自己獲罪爾其戒之

閏三月辛卯

上諭陝西督撫提鎮等官曰朕宵旰勤民慮周遐邇緣向來巡幸未經親莅邊境頃特濟河而西循秦省沿邊地方延覽風俗諮詢疾苦見所在兵民築土屋以為居耕砂碯以為業生聚之計甚屬艱難朕惻然於衷軫念弗

釋因思兵民倚賴全在將吏而將吏之表率惟督撫提鎮是視誠使督撫提鎮實能正己澄源則所屬守職奉公祿足自贍必無朘削兵民之事若積習相沿濫受屬員私饋因而所屬官弁節次索取償於下文則加徵無藝武則侵扣月餉勢不至於厲民剥兵不止如此而欲冀其疾苦日蘇生聚日盛烏可得乎夫秦地俗尚素稱簡樸邊方士卒尤屬精銳總視撫馭得人斯於兵民胥益朕自駐蹕寧夏特召該省督撫提督總兵官以下

官員凡在鎮城者俱賜宴行宮而加諄諭無非期望文武大吏董率屬員以仰副朝廷愛兵恤民至意自今以後爾等其益體朕懷交相砥礪文官皆習知民事豈身作官吏不恤百姓之依武職多出身行伍豈甫為將領遽忘軍士之苦上官克謹廉隅屬吏各遵法紀馴至比屋殷阜列戍飽騰則兵民皆得其所而爾等亦與有休寵以視厲民剥兵身名俱隕者孰得孰失爾等其敬念之



康熙三十七年戊寅正月壬寅

上諭湖廣總督李輝祖河南巡撫李國亮雲南巡撫石文  
歲浙江巡撫張勳山東布政使劉暉等曰凡居官以實  
心愛民為主民雖愚終不能欺也果能實心愛民民自  
知感否則竭力矯飾終難掩人耳目朕在宮中惟以百  
姓為念督撫身在地方與百姓最親豈可不一心愛民  
副朕委任之意一省之事全在督撫督撫潔已率屬則  
府州縣自然遵奉爾等係封疆大臣當自惜聲名自立

品望朕巡幸浙江江南陝西山西等處百姓利病俱所深知山陝地瘠地方官略加朘削情即顯露然州縣之私派皆由督撫布按科派所致若止在州縣官則所害者不過一州一縣巡撫與布政使通同妄行則合省俱受其害矣此等人朕斷不姑容爾等識之

康熙三十九年庚辰十月己巳

上諭河南巡撫徐潮曰河南火耗甚重當嚴行禁止又聞彼處虧空甚多如何籌畫令無虧空河南連歲有秋未

知積貯何如今天下太平武備不可有懈巡撫有標下  
兵卒爾從翰林出身武事恐未必留心宜飭將弁不時  
操練爾撫標操練精強則兩總兵官有不凜然操練者  
乎

康熙四十年辛巳九月庚子

上諭大學士等曰朕觀居官之人或優於微職至大任則  
改常者有之今部院堂司官等但求偷安而已並不勤  
於理事即侍衛亦比前少怠人雖優於辦事若不勤慎

亦何益哉

壬子

上諭大學士等曰朕凡用人皆諮詢諸大臣而後用於諸大臣不信將誰信耶朕聽政四十餘年觀爾諸臣保奏皆各為其黨爾等致位宰輔皆有可否人材之責朕凡諮訪人材當以實對若惟恐結怨不行陳奏何以責人耶

康熙四十一年壬午正月癸卯

上諭大學士等曰朕觀諸臣任科道時多有敢言沽取直聲以得陞遷者及為大僚輒不敢言問以小吏皆云不知前後何頓不相符耶

七月丙辰

上諭大學士等曰今之科道糾叅一官舉國皆聞方始入告或有先以疏稿示欲叅之人然後題叅者或有先告以題叅之意其人不懼然後題叅者若果貪污理宜叅處倘因私怨以此微細故即行題叅事必滋擾矣

十月辛卯

上諭山東省官員等曰爾等為官以清廉為第一為清官甚樂不但一時百姓感仰即離任之後百姓追思建祠以祀豈非盛事蓋百姓雖愚而實難欺官員是非賢不肖人人有口不能強之使加毀譽爾等各宜自勉

十一月丁巳

上諭大學士等曰近見各部院衙門所辦事件有錯悞者惟恐事情覺露專務隱匿不行檢舉朕總理萬幾亦止

詳識緊要事務安能逐事一一記之各部院檔案繁多勢不能無舛錯遺漏或有舛錯遺漏而即自行檢舉則其過猶為可恕若懼罪隱匿不行檢舉則事必終於舛錯貽誤甚大爾等將此旨傳諭各部院滿漢大臣知之

康熙四十二年癸未正月丙寅

上諭大學士等曰齊世武自授甘肅巡撫所屬各官俱被叅劾署事竟至乏人其中有初任者亦有他省調補者果有不法自當叅處若止小過則懲戒可耳

二月丁亥

上諭大學士等傳諭偏沅巡撫趙申喬曰湖南地方介在邊遠之境聞向來官吏積習相仍無藝私徵種種不一計每歲科派有較正供額賦增重數倍者有司徵收錢糧加取火耗又視別省為獨重百姓窮蹙不支多致流離轉徙非將宿弊逐一剔除無以砥礪官方大甦民困從前已往諸事姑免察究外爾到地方嚴飭大小屬員痛改前非洗心奉職力減加耗盡革私徵務使流移者



復返鄉閭守業者獲安隴畝副朕軫念遠省民生至意如仍有藐法不遵重為民害者即據實糾叅從重治罪決不輕宥

乙未

上諭大學士等曰趙申喬分文不取信然但朕臨幸杭州諮訪百姓言趙申喬好收詞訟民多受累大凡居官固貴清廉尤必和平始為盡善如果好受詞訟刁民興訟即使審理其被訟之人一家產業已蕩然矣如此民何

以堪聞阿山亦喜受民詞訟總之為督撫者以安靜不生事為貴耳

九月丁巳

上諭大學士九卿等曰朕因山左災荒勞心殫思屢行諮訪山左歲歉非止今歲為然地方官歷年隱匿不報今春朕因閱視河工親見災黎情形始行籌畫賑濟今歲田禾雖云失望尚有薄收之處巡撫布政使為伊等素有欠缺欲巧圖完補故甚其詞以奏報又黃綠料道紛

紛急奏言盜賊蠭起人民相食私冀或開事例或撥銀兩因於其中侵蝕託言賑濟而實欲完補虧空以施鬼蜮之謀也今京師遣往三路賑濟人員俱掣籤派撥州縣並不分成災與否一概散賑遣去人員未奉有稽察諭旨惟視巡撫布政使所指地方賑濟應將此事交與三路大臣加意稽察至御史李發甲條奏盜賊蠭起人民相食亦當明白詢問如盜賊蠭起必有殺人放火搶奪財物糧米之處與失事之人如人民相食亦必有被

傷之人與食人之人如有不實即為巡撫布政使急請設法銀兩而言也大學士九卿諸臣會同議奏言官並不實心為民專為巡撫布政使起見不誠可愧乎

康熙四十三年甲申正月辛酉

上諭大學士等曰朕數巡幸諮訪民生利弊知之甚詳小民力作艱難每歲耕三十畝者西成時除完租外約餘二十石其終歲衣食丁徭所恃惟此為民牧者若能愛養而少取之則民亦漸臻豐裕今乃苛索無藝將終年

之力作而竭取之彼小民何以為生耶如朕前遣侍衛  
至鐵索橋掛匾還京回奏彼處督撫餽六千餘兩夫一  
侍衛而費至此則凡部院司官筆帖式等差遣往來者  
又不知煩費幾何去歲所遣祭告諸臣回都朕曾問一  
二人彼雖飾辭以對然地方所費亦不少矣目今巡撫  
皆有廉聲而司道以下何嘗不受州縣餽遺總之此時  
清官或分內不取而巧取別項或本地不取而取償他  
省更有督撫所欲扶持之人每歲暗中助銀教彼掠取

清名不踰一二年隨行薦舉似此互相粉飾釣譽沽名  
尤屬不肖之極至於蠲免錢糧原為加恩小民然田畝  
多歸縉紳豪富之家小民所有幾何從前屢頒蠲詔無  
田窮民未必均沾惠澤約計小民有恒業者十之三四  
耳餘皆賃地出租所餘之糧僅能度日加之貪吏苛索  
蓋藏何自而積耶朕比年巡幸七省惟秦晉兩地民稍  
充裕畿南四府及河南一路殊覺生計艱難山左初次  
巡幸民甚饒裕繼而少減今則大異往昔矣皆由在外

大小官員不能實心體恤民隱為民除弊而復設立名  
色多方徵取以此民力不支日就貧困科道官職司風  
紀當一切不避見之敷陳今惟挾仇報復者掛之彈章  
否則斷斷不言或專倚一人藉聲勢而聽其指使然後  
敢言甚有大言不慚妄自矜誇者考其行事與言迥別  
子曰先行其言而後從之夫已之言已且不能行徒見  
之敷陳何益之有

三月癸卯

上諭大學士等曰部院情弊朕知之甚悉凡部院駁回事  
件有應駁回者亦有有故而駁回者倘欲實指其事朕  
並其始末皆能細言之朕日聽萬幾惟據其理而處之  
以公平斷不瑣屑苛求但諸臣當自知足知足方不辱  
也

五月壬寅

上諭尚書侍郎等曰天下之民所倚以為生者守令也守  
令之賢否係於藩臬藩臬之賢否係於督撫督撫又視



乎部院大臣而行部院大臣所行果正則外自督撫而  
下至於守令自為良吏矣今工部弊端發露爾等亦知  
愧否工部之弊朕屢降嚴旨切責並不悛改以至於此  
郎中費揚燾等俱九卿保舉之人仍爾作弊侵蝕河工  
帑金殊屬不堪堂司官上下扶同但利之所在罔顧身  
命此何謂也爾等身為大臣誠能彼此箴規有所見聞  
即為剖示屬官有品行不端者即罷斥之庶幾無玷厥  
職今部院諸弊爾等豈果不知但恐結怨於人隱忍不

言科道官員亦因彼此掣肘不肯條奏舉劾耳嗣後如有不謹識朕諭仍循故轍經朕察出必不姑宥

十一月壬戌

上諭大學士等曰徐潮為河南巡撫時居官實好平易得體民無不稱頌之者朕西巡時經河南見州縣司道官內有衰老者朕即酌量革退徐潮亦少過寬耳觀李光地近日聲名較前稍減彼每被人欺誑大凡為督撫者一被人欺誑則權必旁移張鵬翮向有清名在河工亦

甚効力但被屬員王謙等欺誑耳身雖不要錢子姪親戚在外指名取錢可謂自己不取耶為大臣者約束不嚴自謂已不之知諉之他人可乎

康熙四十四年乙酉四月壬辰

上諭河道總督張鵬翮曰爾前因衝決時家馬頭叅佟世祿一案於阿山徐潮勘奏後具疏強辯爾又請開河工捐納抵補事例明係脫卸屬員王謙等凡人既讀書先要辨明公私二字凡事從公起見方可以服人爾之名

節關係固重終世祿之身家關係獨不重乎王謙為人刻薄人人怨恨爾却偏信任其恣意妄行以致人心不服爾常云非堯舜之道不敢陳於王前如此行事豈得謂堯舜之道朕非不知爾在河工能任勞苦但聽信屬員流於刻薄從來大儒持身接物當如光風霽月爾平時亦講理學乃一味苛刻嚴厲豈所謂光風霽月乎況大臣受朝廷委任必須為國為民事事皆有實濟若徒飲食菲薄自表廉潔於國事何益耶

十二月庚戌

上諭貴州巡撫陳詵曰貴州地小易治雖有苗人亦無他  
事但以文武和睦安靜不生事為要清官多刻刻乃清  
官不足處屬吏貪污固當叅劾其居官平常者則須教  
誨之邊地原苦為大吏者不可見才若生事顯才便非  
正理爾切識之

康熙四十五年丙戌三月丁亥

上諭盛京戶部侍郎董國禮工部侍郎席爾圖曰前因盛

京衙門事務每至遲悞是以朕自京選擇大臣補授令聞官員辦事不勤爾等可往嚴察使朝參習射諸凡公事及圍獵不得有悞倘或不嚴朕有所聞爾等亦不能免罪

七月丁巳

上諭大學士等曰朕自親政以來斷不許人懷挾私讎互相陷害是以三四十年間無大臣懷私互訐之事此一事朕心頗以為善凡誣陷人及攻城屠戮人者縱使其

身倖免於禍子孫斷乎不昌近觀貪官受報亦復如是  
從前督撫如屈盡美韓世琦白如梅賈漢復張長庚等  
皆以貪故其子孫極貧困不能自存或有學道考試不  
公而所生之子凡書讀過即忘并有瘖啞者天道甚可  
畏也前次考試時有朕所素知之人與考朕恐使人知  
之則必取中故不以告人凡人功名所繫去取但欲其  
秉公耳朕尚以孤寒抱屈為念試官何不一計及於此  
乎

已卯

上諭大學士等曰侍郎穆和倫人不甚惡但性執拗耳朕聽政四十餘年何人不知何事不歷似此執拗之人倘有大事必至貽誤而伊身亦罹禍矣昔經略莫洛於事敏達而騎射亦優人材壯健但偏執已見莫洛欲率伊所招綠旗兵丁進剿其時王輔臣諫云召募之人不可信用莫洛言我所用之人有負我者乎朕所遣訥爾泰亦在彼力勸阻之莫洛謂訥爾泰童穉何知不聽與莫



洛同行之員外郎薩哈連馳報至京朕謂之曰汝速往  
諭經略斷不可輕率兵前進進必有變莫洛執意欲行  
至寧羌州地方王輔臣標下官兵鼓譟莫洛遂身被其  
害于成龍亦妄帶人至河上自謂所帶之人斷不負彼  
而信用之後皆貽誤朕往閱南河在御壩上朕親指示  
赫碩色令在此地下樁築堤乃過三季不築而河工皆  
不可問矣以此治赫碩色之罪後張鵬翮到任並無別  
項効力但遵朕所指急速築堤而河工告成既築此堤

有利於民衆民咸喜名之曰御壩故凡執拗輕信之人未有不悞厥事者也

乙酉

上諭福建陸路提督藍理曰福建近海關係緊要曩時諳練海戰者猶有其人今則寥寥矣且天下承平日久人皆貪於逸樂若不時加訓練萬一有事欲令其舍命冒險難矣爾當小心約束勤於操練務期兵民輯睦又

諭天津總兵官師懿德曰天津地方近在京師昔趙良棟

為天津總兵官時甚善爾但以為法足矣爾年既壯人材亦健但當以驕傲為戒使無誤公事

十月庚寅

上諭武殿試讀卷官等曰凡人必耐得勞苦乃能有成不耐勞苦到處無用不但武臣為然即文臣若不勞苦學問如何成就今爾等二三老臣年雖高而勤勞實甚觀部院官止圖安逸凡事俱不經心至於會議時九卿內但一二人立議餘皆隨班畫題竟少諳練事務之人矣

十一月壬午

上諭江南江西總督邵穆布曰朕知爾平日敬慎敬慎則何事不可為凡事不可遲緩若事久則弊生惟勤敏則事不壅積矣

康熙四十六年丁亥三月戊寅

上駐蹕松江府城內令地方各官俱近前

諭曰江南錢糧既多火耗雖輕養贍家口斷無不足清乃居官之常清官每多殘酷清而能寬斯為盡善

六月乙巳

上諭大學士等曰今部院一切公事堂官司筆帖式遞相推諉皆不留心部院官員當以敬慎廉潔矢之於心勉勵不怠朕尚不憚勤勞朝夕與諸臣商確政事伊等可圖安逸乎

大清聖祖合天弘運文武睿哲恭儉寬裕孝敬誠信中和  
功德大成仁皇帝聖訓卷四十五